



Saute el garnoule



Saute el garnoule,
Saute su chés nénufars
Et pi au mitan d'chés têtards.

Saute el garnoule,
Saute edsous d'chés halaus
Et pi intre chés tiots kévaus.

Saute el garnoule et pi monte su t'n ékèle
Pour que biau fuche ch'timps din ch'ciel.

Jacques Migneau



Vole tiot ojau

Vole tiot ojau
Au dzeur d'chés épriaus
Din l'vint
Au dzeur d'chés kémins.

Vole tiot ojau
Au dzeur d'chés kévaus
Din l'vint
Au dzeur d'chés codins.

Vole tiot ojau
Au dzeur d'chés payis cauds
Din l'vint
Au dzeur d'chés rojins.

Vole tiot ojau
Au dzeur d'où qu'i fait toudi biau
Din l'vint sin parel
Et pi amène nous ch'solé.



Jacques Migneau



Chés ratons

Enui, ch'est l'Candleur
Et pi Man ale prépare chés ratons.
Cha sint bon din toute el mason
Qu'ch'est in vrai bonheur !

In tiot bout d'bure din l'payèle
Ene tiote louche ed pâte dzeur
Et pi Man ale a pon sin parel
Pour artourner el crapète sin peur.

Ale la fait valser in l'air,
Et pi jamais ale n'két par tière
Man ale a vramint ch'coup d'main.

Quand ale a fini s'n'ouvrache
Et pi qu'in a été bin saches
Adon, in avale tout aveuc nous parints.



Jacques Migneau

L'ducasse



Mi, j'a ker l'ducasse !
Et pi j'y va dès qu'ale passe.
Ej monte su chés bidets d'bos
Ou su chés manèches d'autrefos.
J'acate pour mi d'el bèrbe à papa
Et pi pour min tiot frère du nougat.
Au soir, ej minge in cornet d'frites
Et pi j'bos éne pinte ed bière.
Min porte-monnaie i est plat comme éne alite
Mais ej su fin Bénache et pi tout fier
D'avoir gagné chonc kilos ed riz.
Car ch'est toudi cha d'pris
Comme dit m'grand-mère
Qui n'est pon née d'chés pleuves d'ayer.



Marie-Groète

**Acoute ichi min fiu
Tins bin t'n'orèle
Té comprindras miu
M'histoire ed chorchèle**

**Quand j'étois jonne
Qu'j'avos dés courtés maronnes
J'étois pon toudi sache
Et pi j'mettos m'mère in rache.**

**Ale m'disot adon
D'éne voix ed stentor :
« Marie-Groète ale va vnir
Et pi ale va bin t'punir ! »**

**J'avos éne bièle troule
Aveuc chés boyaus qu'is groul'tent
Et pi j'étois bin vite rapagé
Par sin discours minsongé.**

**Bin sûr j'ai su cha plus tard
Et pour faire un molé vantard
J'li disot : Té sais, Man
J'y croyos pon télmint ! »**

**Et pi ale m'répondot :
« Ti t'es qu'in grand sot
Car si té t'in doutot
Personne n'el voyot ni n'el savot ! »**